

03 SEP 2003

200,000 ORANG DIJANGKA HADIR DI PENUTUP BULAN KEMERDEKAAN

KOTA KINABALU, 3 Sept (Bernama) -- Lebih kurang 200,000 orang dijangka mengunjungi Majlis Penutupan Perayaan Bulan Kemerdekaan di sini pada 16 Sept ini, kata Pengerusi Jawatankuasa Penganjur majlis itu Datuk Anifah Aman.

Majlis itu yang akan disempurnakan oleh Timbalan Yang di-Pertuan Agong Sultan Mizan Zainal Abidin akan diserikan lagi dengan persembahan hiburan, perarakan kereta berhias dan pertunjukan bunga api.

Ia juga akan dihadiri oleh Perdana Menteri Datuk Seri Dr Mahthir Mohamad dan anggota Kabinet kerajaan persekutuan dan negeri, katanya semasa melawat persediaan untuk acara itu di Kompleks Sukan Likas di sini, hari ini.

Antara artis yang dijemput bagi membuat persembahan pada malam itu ialah Abu Bakar Ellah, Siti Nurhaliza, Ella dan juga artis-artis daripada Akademi Fantasia.

Selain daripada itu, Anifah yang juga Timbalan Menteri Perusahaan Utama berkata orang ramai akan berpeluang menyaksikan pertunjukan bunga api "yang lain daripada yang lain" pernah disaksikan sebelum ini.

Beliau juga berkata pihak penganjur akan memastikan acara kali ini adalah yang terbaik sebagai penghargaan kepada Dr Mahathir yang akan bersara pada bulan depan biarpun pihak penganjur menghadapi masalah kekurangan peruntukan.

Anifah berkata masalah kekurangan peruntukan ini dijangka dapat diatasi menerusi sumbangan pihak dan individu yang bermurah hati dalam membantu menjayakan majlis ini.

-- BERNAMA

MK PR